

յԱսորի գրոց 'ի քաղաքն Սիւ յաւուրս Գրիգորի Մագիստրոսի և որդւոյ նորա Գրիգորի Վկայասիրի, ուր յետ այլոց բանից յարէ. « Եւ յետ յամին հինգերորդի ելանելոյ իւրոյ յերուսաղէմ, իբրեւ լինէր առատութիւն կերակրոյ, ևւ վերանայր սոփն 'ի Հրէաստանէ և 'ի յերուսաղէմէ, ինքն Հեղինէ տիկինն Աբգարու ձեռն արկ և սկսաւ պարապել 'ի շինութիւն մատրանաց: Նախ սկիզբն արար շինել մատուռն իմն մեծամեծ քարամբք բրդածեւ 'ի վերայ շիրմին Քրիստոսի, ևւ այլ փոքր մատուռ ինչ 'ի լեառն Զիթենեաց 'ի վերայ Ս. Ոտնատեղւոյն Քրիստոսի: Ապա շրջապատեաց քարամբք զՍ. Այրն ծննդեանն Քրիստոսի, որ 'ի Բեթղէհէմ քաղաքի, յորում է և մնուրն, ուր և եղաւ մանուկն Յիսուս խանձարապատ: Եւ հուսկ ուրեմն ետ յօրինել կամար մի 'ի վերայ շիրմին Յակոբայ մեծի Առաքելոյն որդւոյն Զերեթեայ, ուր ստէպ այց ելանէր առ Ս. Կոյսն մայրն Յիսուսի մերձ 'ի վերնատունն Սիօնի...: Եւ յետ յօթներորդումն ամի վախճանի անդ, և թաղի առաջի դրանն Երուսաղէմի, որ 'ի հիւսիսակողմն քաղաքին, զկնի երկրորդ ամի Վերափոխման Ս. Կուսի մօրն Յիսուսի, 'ի Սեպտեմբեր ինն » : Սորաբարձրեալ Երուսաղէմ. 6. ևւ յետոյ կանգնեցին 'ի վերայ գերեզմանի նորա շիրմի նշանաւոր ևւ փառաւոր յոյժ, որպէս գրեն Եւսեբի ևւ մերս Խորենացի. Հոգ. Բ. Պրակ. 32: Ականատես 'ի ճանապարհորդելն իւրում յԱղէքսանդրիա աշակերտակցովք իւրովք 'ի ձեմարան գիտութեան, որ և մնացին աւուրս ինչ յերուսաղէմ: Մեռաւ անդ ևւ զօրավարն Խուրան ևւ թաղեցաւ առ շիրմի նորին :

Իսկ յաղագս շիրմի երանելի տիկնոջն պատմէ Հ. Ղուկաս Ինճինճեան 'ի գիրս Հնախօսութեան. Հոգ. Բ. 299, զորոյ զբանս գիցուք աստանօր: « Շիրմի կանգնել միայն վասն Հեղինեայ տիկնոջ Աբգարու թագաւորին գտանեմք յիշատակեալ առ Խորենացւոյն, ևւ այն յօտար երկրի...: Բայց զստորագրութիւն այսր շիրմի առ օտար մատենագրի ուրուք գտանիմք. որ նա ինքն է Պաւսանիաս Յոյն յԱրկատեան գիրս իւր, կամ Գիրք Ը. ուր նախ ասէ. « Եւ քանզի բազումս ճանաչեմ շիրմս զարմանալոյ արժանիս, գերկուս միայն յիշատակեցից յայսմ վայրի, զմին յԱղէկառնիա: Իսկ միւսն 'ի Հրէաստան » : Յետ ասելոյ նորա յԱ-